

ACTA DA SESIÓN ORDINARIA CELEBRADA POLA COMISIÓN INFORMATIVA PERMANENTE DE PERSOAL, SERVIZOS, REFORMA ADMINISTRATIVA E SEGURIDADE CIDADÁ O DÍA 23 DE XULLO DE 2013 ÁS 14:00 HORAS.

Sendo as catorce horas (14:00) do día 23 de xullo de 2013, reúnese en sesión ordinaria convocada ao efecto a Comisión Informativa Permanente de Persoal, Servizos, Reforma administrativa e Seguridade cidadá, coa asistencia das/os concelleiras /os que de seguido se indican.

Concelleiras/os asistentes:

Vocais:

Grupo municipal popular

M^a Carmen Verde Leboráns

Grupo municipal socialista

José Manuel Miñones Conde

M^a Isabel González Cancela

Concelleiras/os non adscritas/os

M^a Pilar Candocia Pita

Xosé Anxo Doval Rey

Manuel J. Ferreiro Santiago

Alfonso Rey López

María González Gómez

Emilio Martínez Carballeira

Ramón García Argibay

Presidente: Don Santiago V. Amor Barreiro

Secretaria: Dona Rosa Ana Prada Queipo

Asiste don **Miguel Díaz Aviñoá** na súa calidade de informático para responder ás cuestións técnicas que se plantexen polos membros da Comisión.

ORDE DO DÍA:

Punto primeiro.- Aprobación, se procede, de actas anteriores.

Intervén a señora secretaria dona **Rosa Ana Prada Queipo** para expoñer que en relación á acta de 19 de abril de 2013, que quedara pendente de ser revisada de cara á súa aprobación, que dada a calidade técnica da gravación non se pode escoitar ben, pero á vista do alegado por don **Ramón García Argibay**, propón incluír un texto alusivo a unha intervención sobre o voto ponderado, dando lectura ao mesmo e que é do teor seguinte: *Intervén dona **María Dolores Fernández Álvarez** para plantexar a posibilidade de acudir ao voto ponderado, o cal a señora **secretaria** considera que é unha figura actualmente derogada.* Resposta o señor **García Argibay** que tería que vir a concelleira dona María Dolores Fernández Álvarez para falar das súas intervencións, respondendo a señora **secretaria** que aínda presentándose a concelleira ela non pode dar fe do que realmente se dixo porque se superpoñen varias voces, que entendería o voto en contra da señora Fernández Álvarez pero que non pode recoller nada mais na acta que o xa recollido. O señor **García Argibay** anuncia un voto de abstención.

A acta da sesión de 19 de abril de 2013 resulta aprobada, co engadido antes reflectido, coa abstención de don Manuel J. Ferreiro Santiago, don Alfonso Rey López, dona María González Gómez, don Ramón García Argibay e don Emilio Martínez Carballeira e o voto favorable do resto dos asistentes á comisión informativa.

A acta correspondente ao 21 de xuño de 2013 resulta aprobada por maioría absoluta, coa abstención de dona María González Gómez por non ter estado presente nesa sesión, e o voto favorable do resto dos asistentes á Comisión.

Punto segundo.- Aprobación inicial do Regulamento de uso e servizo de bens

informáticos e de comunicación.

Informa substancialmente o señor presidente da comisión don **Santiago V. Amor Barreiro** que a razón deste regulamento ven dada pola multiplicidade de ferramentas informáticas presentes no traballo diario do concello, que está presente o informático municipal don Miguel Díaz Aviñoá, por se algún concelleiro ten algunha dúbida respecto deste asunto. Indica que este regulamento ten como base o borrador que se fixera baixo o mandato do anterior concelleiro da área, señor Miñones, sobre o que se introduciron algunhas modificacións para adaptado á nova normativa.

Intervén o concelleiro don **Xosé Anxo Doval Rey** para interesarse polo emprego de software libre por parte dos usuarios.

Responde o informático don **Miguel Díaz Aviñoá** que non se prohíbe, pero que ten que ser solicitado formalmente.

O señor **Doval Rey** anuncia un voto de abstención a efectos de poder estudar mais en profundidade o texto que se presenta.

Intervén o concelleiro don **Ramón García Argibay** para dicir que a pesares de considerar que o texto do regulamento está ben, eles teñen cousas que aportar, polo que se van abster.

Polo grupo municipal socialista intervén o concelleiro don **José Manuel Miñones Conde** para interesarse pola razón da prohibición para o usuario, especificada no punto 9 do artigo 9. Responde don **Miguel Díaz Aviñoá** que se trata de coñecer inequivocamente aos usuarios, dado o perigo que supón a cesión de contrasinais, que é un dos males mais estendidos. Indica que deste xeito se poderá saber quen accede realmente á información.

Continúa interesándose o señor **Miñones** en relación ao punto 11 onde se fala do bloqueo da sesión si o usuario se ausenta do posto mais de 15 minutos, respondendo o señor **Díaz Aviñoá** que 15 minutos parece un tempo adecuado para bloquear a pantalla se se vai estar ausente, aínda que ao sistema se lle poña despois un bloqueo de 11 ou 12 minutos, tendo sempre por defecto unha regra a maiores.

O señor **Miñones** se refire ás contas de correos electrónicos no caso de baixa dunha persoa, preguntando quen pasa a xestionalas. Responde o señor **Díaz Aviñoá** que cando unha conta se especifica con nome punto apelido pertence a unha persoa en concreto e se se lle da a clave a outra podería causar problemas, outra cousa é validar que o correo dun usuario o reciba outro, a través dunha petición que se traslada á Deputación, quedando alí anotado. Se se produce unha ausencia temporal e se quere que outra persoa reciba os correos, se deberá solicitar formalmente. Todas as variantes de ausencia e novos usuarios de contas deben estar regulamentadas.

Continúa o señor **Miñones** comentando que no regulamento se pon que non se poden instalar mais programas, preguntando se os xa instalados se darían de baixa, respondendo o señor **Díaz Aviñoá** que hai certos programas que se poderían “normalizar” e pouco a pouco poñelos en orde nun período non moi extenso de tempo.

Continúa o señor **Miñones** preguntando polos formularios dos que se fala no regulamento, ao que contesta **Miguel Díaz Aviñoá** que son formularios totalmente editables e tratan de que o departamento use o mínimo de papel posible, por iso son pdf editables, cubrindo os campos que faga falla e se valida, se pode ser con certificado dixital.

Continúa preguntando o señor **Miñones**, se o CAU, a rede e a intranet seguen funcionando, contestando o señor **Díaz Aviñoá** que co CAU houbo un pequeno problema técnico e se deixou de utilizar unha temporada coa idea de volvelo a activar

unha vez aprobado este regulamento e que a xente puidera mandar as incidencias.

Pregunta o señor **Miñones** ao alcalde se está previsto impartir formación ao persoal, contestando o señor **alcalde** que ao persoal hai que proporcionarlle este documento, todas as dúbidas se resolverían polo departamento e poderíase tamén facer unha xornada informativa para quen o precise.

Toma a palabra novamente don **Ramón García Argibay** para preguntar se está implantado o controlador de dominio. Tamén se interesa o señor García Argibay polas políticas de dominio e polas políticas de seguridade. Contesta o señor **Díaz Aviñoá** que está implantado, o que non está é despregado, que segundo se van incorporando pcs novos vaise facendo o despregue por departamentos e segundo se vaia facendo isto, iranse facendo as políticas de dominio. Con respecto ás políticas de seguridade matiza que se pode facer como un engadido, unha vez estipulados os directorios e a documentación á que teñen acceso os usuarios e que se tratou de non facer un Regulamento que fose excesivamente denso.

Remata a súa intervención o señor **Díaz Aviñoá** dicindo que este regulamento non está totalmente pechado, que están abertos a suxestións ou aportacións que se poderían discutir.

Tras un breve cambio de impresións o asunto é ditaminado favorablemente por maioría simple co voto a favor dos membros do grupo municipal popular e a abstención do resto dos asistentes á comisión informativa.

Punto terceiro.- Nova composición das comisións informativas permanentes.

Informa substancialmente o señor presidente da comisión don **Santiago V. Amor Barreiro** que este asunto xa se tratou no mes de abril e acordouse pedir un informe á Deputación. O informe chegou o pasado día 25 de xuño e a conclusión do informe figura no documento, considerando que esa é a proposta mais axeitada e que ademais coincide coa proposta pola secretaria no seu informe. Este é o motivo de traer este punto novamente a Comisión.

Toma a palabra o concelleiro don **Xosé Anxo Doval Rey** para dicir, substancialmente, que no propio informe da Deputación, concretamente no apartado de conclusións, se acode á ficción de considerar que os concelleiros non adscritos actúan, solo a efectos organizativos, como se foran un grupo, e que de acordo con esta ficción, que coincide co que eles veñen sostendo desde que abandonaron o BNG, tamén podería considerarse que entre os non adscritos hai dous grupos, e que parece que non hai nada que o impida.

Intervén o concelleiro don **Ramón García Argibay** para dicir, substancialmente, que lendo as conclusións se di no informe que serían xuridicamente aceptables as tres solucións plantexadas, outra cousa é que o letrado que asina o informe se incline por unha das tres. Agora é cuestión desta Comisión decidir cal das tres solucións é a mais acertada e porqué, porque o informe di que as tres son xuridicamente válidas e cada un ten a súa opinión.

Toma a palabra novamente don **Xosé Anxo Doval Rey** para dicir, substancialmente, que cando houbo a modificación dos representantes do grupo municipal popular xa quedaron en 2 e se no pleno de organización se dicía que había 7, non habería nada que modificar. A cuestión sería como se poñen de acordo para ir ás comisións, opinando que o que habería que facer é optar por unha fórmula de nomeamento deses 7 e sometela a votación.

Intervén o presidente don **Santiago V. Amor Barreiro** para dicir que hai un antecedente, na comisión informativa especial do tema dos plenos de setembro e novembro, na que hai 3 representantes dos non adscritos e entre eles se organizaron para ir.

Volve a intervenir **Xosé Anxo Doval Rey** para dicir, substancialmente, que eles se van a poñer

de acordo, pero do que hai que falar é de como se designan eses 7. Comenta que el ten unha teoría para poder poñerse de acordo pero que seguro que non van a estar todos os non adscritos de acordo e que non sabe que é o que hai que ditaminar agora.

Intervén a secretaria **Rosa Ana Prada Queipo** para dicir que o que se somete a ditame é a proposta de modificación da composición das comisións informativas. Non se pode descoñecer que neste momento hai 10 concelleiros non adscritos na Corporación e que a composición das comisións informativas debe modificarse. Como se poñan de acordo os concelleiros non adscritos para ir ás comisións é un problema de índole práctico, terán que falar entre eles e poñerse de acordo.

Se ben é certo que no informe da Deputación se fala de que as tres opcións son xuridicamente posibles, as outras dúas teñen matices e dado o contido do artigo 73.3 da LBRL, o propio informe conclúe que a que mellor se adecúa á situación concreta deste Concello é a primeira.

A secretaria remata dicindo que como na anterior comisión informativa na que este asunto foi tratado por parte dalgúns concelleiros plantexábase unha posible vulneración de dereitos fundamentais, foi a razón pola que a propia Secretaría insistiu en solicitar informe ao servizo de asistencia a municipios da Deputación. O informe chegou e corrobora o informado por esta Secretaría, a cal insiste en que á vista da nova composición da Corporación, debe necesariamente modificarse a composición das comisións informativas, non obstante o cal a Corporación, co seu mais alto criterio, acordará o que proceda.

Intervén novamente don **Xosé Anxo Doval Rey** para propoñer que o alcalde convoque aos grupos políticos e demais integrantes da Corporación para poder chegar a un acordo de cal é a composición de 2, 2 e a ficción de 2 + 1. Remata a súa intervención dicindo que non pode opinar dos outros, pero que eles estarían de acordo.

Intervén dona **Pilar Candocia Pita**, que solicita que conste en acta que eles piden que se busque unha solución pactada, que o alcalde os convoque para buscar esa solución, que é moi necesaria e que non so afectaría ao funcionamento das comisións. Insiste tamén en que todos os concelleiros deberían poder traballar en condicións de igualdade.

Tras un breve cambio de impresións o asunto é ditaminado desfavorablemente cos votos a favor dos membros do grupo municipal popular, dos votos en contra dos/as concelleiros/as dona M^a Pilar Candocia Pita, don Xosé Anxo Doval Rey, don Manuel J. Ferreiro Santiago, don Alfonso Rey López, dona María González Gómez, don Ramón García Argibay e don Emilio Martínez Carballeira e a abstención dos membros do grupo municipal socialista.

E non habendo mais asuntos de que tratar o señor presidente da por rematada a sesión ás catorce horas e trinta minutos do día de referencia de todo o que eu como secretaria certifico.